

## Timpeallán trioblóideach

**Ceist 1** Beidh tú ag féachaint ar ball ar thuairisc faoi thimpeallán Kirwan i gCathair na Gaillimhe. Féach féin agus an duine in aice leat ar na focail seo a bheidh le cloisteáil sa mhír. An dtuigeann sibh iad?

1. feachtas \_\_\_\_\_
2. grúpa timpeallachta \_\_\_\_\_
3. a bhainistiú \_\_\_\_\_
4. beartaithe \_\_\_\_\_
5. áis oideachais agus sláinte \_\_\_\_\_
6. croílár \_\_\_\_\_
7. éiceolaíocht \_\_\_\_\_
8. obair athchóirithe \_\_\_\_\_
9. cumar \_\_\_\_\_
10. brú tráchta \_\_\_\_\_
11. scamhóga \_\_\_\_\_
12. cuir i gcrích \_\_\_\_\_

Anois, féachaigí ar an tuairisc le feiceáil an gcuideodh sin libh. Mura bhfuil sibh cinnte faoi bhrí na bhfocal tar éis na chéad éisteachta, pléigí na focail leis an teagascóir.

Cén Ghaeilge atá ar na téarmaí seo?

- *ecosystem*
- *wildlife*

**Ceist 2** Féach ar an tuairisc arís agus freagair na ceistanna seo thíos.

1. Cén fhadhb a bhaineann le timpeallán Kirwan?
2. Cá bhfuil an timpeallán?
3. Cén fáth a bhfuil an grúpa timpeallachta i gcoinne na n-oibreacha bóthair?
4. Cad a dúirt Micheline Sheehy Skeffington agus Michael Tiernan sa tuairisc?
5. Cén fad a thógfaidh an obair agus cén costas a bheidh uirthi?

**Ceist 3** ‘...an obair atá beartaithe...’

- A. Féach ar an tuairisc arís agus breac síos na samplaí eile den aidiacht bhriathartha a úsáideann Irene Ní Nualláin.
- B. Líon na bearnaí sna habairtí thíos leis an bhfoirm cheart den bhriathar – is é sin, an aidiacht bhriathartha.
  - Bheadh an obair \_\_\_\_\_ (críochnaigh) agam faoin am seo dá mbeadh na leabhair chearta agam.
  - Ní bhfuair mé an bainne mar bhí an siopa \_\_\_\_\_ (dún).
  - Nach bhfuil an dinnéar \_\_\_\_\_ (déan) agat fós? Tá mé caillte leis an ocras.
  - Níl an t-iarrthóir sin \_\_\_\_\_ (cáiligh) go leor don phost.

- Beidh an leabhar \_\_\_\_\_ (léigh) aici faoi dheireadh an lae.
- Bíodh gach pointe sna nótaí a thug mé daoibh \_\_\_\_\_ (foghlaim) agaibh.
- Ní raibh mé in ann an aiste a léamh mar ní raibh sí \_\_\_\_\_ (clóscríobh).
- Féach! Tá na glasraí atá díreach \_\_\_\_\_ (ceannaigh) agat \_\_\_\_\_ (lobh)!

**Ceist 4**

An féidir leat a mhíniú cén fáth a bhfuil séimhiú in úsáid i gcás na samplaí seo thíos ón mír nuachta? Mura bhfuil tú cinnte, pléigh na pointí leis an duine in aice leat.

- ‘don choil’
- ‘ar bhrúach’
- ‘cúig bhóthar’
- ‘Cathair Ghlas’
- ‘an choil’

**Ceist 5**

‘...ar bun...’

Tá a lán nathanna cainte sa Ghaeilge a bhfuil an focal ‘bun’ iontu. Cuir na cinn seo thíos in abairtí lena mbrí a léiriú:

- bun ná barr
- bun ar an aimsir
- i mbun
- bun fírinne

**Ceist 6**

Pléigh na ceisteanna thíos leis na daoine eile i do ghrúpa.

1. Cén tábhacht a bhaineann le spásanna glasa a bheith i gcathracha?
2. Cén réiteach atá ar fhadhb thráchtá an timpealláin, dar leat?
3. Is minic a chuireann forbairt uirbeach isteach ar éiceachórais. Cén réiteach atá ar an bhfadhb sin, dar leat?

## Treoracha agus Freagraí

### Ceist 1

1. feachtas	<i>campaign</i>
2. grúpa timpeallachta	<i>environmental group</i>
3. a bhainistiú	<i>manage</i>
4. beartaithe	<i>planned</i>
5. áis oideachais agus sláinte	<i>an educational and health resource</i>
6. croílár	<i>centre, core</i>
7. éiceolaíocht	<i>ecology</i>
8. obair athchóirithe	<i>restoration work</i>
9. cumar	<i>junction</i>
10. brú tráchta	<i>traffic jam, congestion</i>
11. scamhóga	<i>lungs</i>
12. cuir i gcrích	<i>achieve, complete</i>

*ecosystem* – éiceachóras  
*wildlife* – fiadhúlra

### Ceist 2

Féach an script.

### Ceist 3

**A:** beartaithe (x2), bronnta agus luaite

- B:**
- Bheadh an obair **críochnaithe** agam faoin am seo dá mbeadh na leabhair chearta agam.
  - Ní bhfuair mé an bainne mar bhí an siopa **dúnta**.
  - Nach bhfuil an dinnéar **déanta** agat fós? Tá mé cailte leis an ocras.
  - Níl an t-iarrthóir sin **cáilithe** go leor don phost.
  - Beidh an leabhar **léite** aici faoi dheireadh an lae.
  - Bíodh gach pointe sna nótaí a thug mé daoibh **foghlamtha** agaibh.
  - Ní raibh mé in ann an aiste a léamh mar ní raibh sí **clóscríofa**.
  - Féach! Tá na glasraí atá díreach **ceannaithe** agat **lofa!**

### Ceist 4

- ‘don **choill**’: *Cuirtear séimhiú ar ainmfhocail dar tús **b, c, f, g, m** agus **p** i ndiaidh ‘do’ agus ‘don’ de ghnáth.*
- ‘ar **bhruach**’: *Cuirtear séimhiú ar ainmfhocail a leanann **ar** nuair is ionad áirithe atá i gceist.*
- ‘cúig **bhóthar**’: *Séimhítear ainmfhocail dar tús consan tar éis na mbunuihmreacha 2-6.*
- ‘Cathair **Ghlas**’: *Séimhítear aidiacht a leanann ainmfhocail baininsneach.*
- ‘an **choill**’: *Séimhítear ainmfhocail bhaininsneacha dar tús consan (seachas ainmfhocail bhaininsneacha a thosaíonn le **d, s** agus **t**) tar éis an ailt uatha sa tuiséal ainmneach.*

### Ceist 5

- bun ná barr – níl bun ná barr ar an scéal – *it’s a meaningless story*
- bun ar an aimsir – tá bun ar an aimsir inniu agus beidh mé ag sú na gréine ar ball – *the weather is settled*
- i mbun – tá mé i mbun oibre – *I’m working, attending to my work*
- bun fírinne – tá bun fírinne lena ndúirt sé – *based on fact*

### Ceist 6

Is féidir gach beirt a chur ag déanamh an phlé seo agus ansin cuid de na ceisteanna a phlé leis an rang iomlán.

### **Eimear Ní Chonaola**

Bhur gcéad fáilte ar ais. Tá feachtas ar bun ag grúpa timpeallachta i gCathair na Gaillimhe le Coill Thír Oileáin a chosaint ón bplean atá ag Comhairle Cathrach na Gaillimhe le trácht sa gceantar<sup>1</sup> a bhainistiú. Deir an grúpa go ndéanfadh an obair atá beartaithe dochar don choill.

### **Irene Ní Nualláin**

Breis is céad míle crann atá ag fás i gCoill Thír Oileáin ar bhruach Abhainn na Gaillimhe. Áis oideachais agus sláinte atá sa gcoill<sup>2</sup> agus croílár éiceolaíochta na cathrach atá ann. Tá plean ag Comhairle Cathrach na Gaillimhe bóthar a thógáil tríd an gcoill mar chuid d'obair athchóirithe atá beartaithe ar thimpeallán Kirwan ar imeall na cathrach. Baineann ceathracha míle feithicil agus míle coisí úsáid as an timpeallán chuile<sup>3</sup> lá. Cumar atá sa timpeallán ag cúig bhóthar agus is minic a bhíonn brú tráchta ann.

### **Micheline Sheehy Skeffington, Iar-Léachtóir le Luibheolaíocht OÉG**

Tá sé cosúil le scamhógaí<sup>4</sup> na cathrach. Níl áit cosúil leis sin in (aon) áit (eile) i gCathair na Gaillimhe. Agus tá sé cosúil le pasáiste glas nó *wildlife corridor* ... do na hainmhithe ag dul ó áit go háit<sup>5</sup>. Má bhriseann tú suas é sin ... agus tar éis sin níl an pasáiste agus an *ecosystem* ... níl sé coimeáda suas.

### **Michael Tiernan, Lucht Feachtais Choill Thír Oileáin**

Tá muid i gcoinne bóthar dul tríd an pháirc<sup>6</sup>, mar tá sé an-tábhachtach do na daoine spás a bheith acu dul tríd an pháirc agus d'intinn daoine. Mar tá a lán daoine ann inniu agus tá galar intinne acu, agus tá sé an-tábhachtach spás (a bheith) acu dul thart agus siúlóid (a bheith acu) istigh<sup>7</sup> sa pháirc sin.

### **Irene Ní Nualláin**

Tá stádas Cathair Ghlas na hEorpa bronnta ar Chathair na Gaillimhe i mbliana, agus tá lucht feachtais ar a ndícheall ag iarraidh an choill a chosaint.

1.2 milliún euro an costas atá luaite leis an obair athchóirithe ar thimpeallán Kirwan agus meastar go dtógfaidh sé dhá bhliain an obair seo a chur i gcrích. Cuirfidh Comhairle Cathrach na Gaillimhe tús le comhairliúchán poiblí faoin obair atá beartaithe ag deireadh na míosa.

Irene Ní Nualláin, Nuacht TG4 i gCathair na Gaillimhe.

---

<sup>1</sup> Córas Chonnacht

<sup>2</sup> Córas Chonnacht

<sup>3</sup> *gach uile* an leagan caighdeánach

<sup>4</sup> *scamhóga* an leagan caighdeánach

<sup>5</sup> *go háit go háit* a deirtear

<sup>6</sup> Córas Uladh

<sup>7</sup> *isteach* a deirtear